

四庫全書

史部

欽定四庫全書

史部十五

史通目錄

史評類

內篇

卷一

六家第一

卷二

二體第二

載言第三

本紀第四

世家第五

列傳第六

卷三

表歷第七

書志第八

卷四

論贊第九

序例第十

題目第十一

斷限第十二

編次第十三

稱謂第十四

卷五

採撰第十五

載文第十六

補註第十七

因習上第十八

因習下第十九

卷六

言語第二十

浮詞第二十一

叙事第二十二

卷七

品藻第二十三

直書第二十四

曲筆第二十五

鑒識第二十六

探賸第二十七

卷八

模擬第二十八

書事第二十九

人物第三十

卷九

覈才第三十一

序傳第三十二

煩省第三十三

卷十

雜述第三十四

辨識第三十五

自叙第三十六

外篇

卷十一

史官建置第一

卷十二

古今正史第二

卷十三

疑古第三

惑經第四

卷十四

申左第五

卷十五

點煩第六

卷十六

雜說上第七

卷十七

雜說中第八

卷十八

雜說下第九

卷十九

五行志錯誤第十 五行志雜駁第十一

卷二十

暗惑第十二 忤時第十三

欽定四庫全書



史記
目錄

史通原序

長安二年余以著作佐郎兼修國史尋遷左史於門下
撰起居注會轉中書舍人暫停史任俄兼領其職今上
即位除著作郎太子中允率更令其修史皆如故又屬
大駕還京以留後在都無幾驛徵入京專知史事仍遷
秘書少監自惟歷事二主從官兩京遍居司籍之曹久
處載言之職昔馬融三入東觀漢代稱榮張華再典史
官晉朝稱美嗟予小子兼而有之是用職司其憂不遑

啓處嘗以載削餘暇商榷史篇下筆不休遂盈筐篋於是區分類聚編而次之昔漢世諸儒集論經傳定之於白虎閣因名曰白虎通予旣在史館而成此書故便以史通為目且漢求司馬遷後封為史通子是知史之稱通其來日久博采衆議爰定茲名凡為廿卷列之如左合若干言于時歲次庚戌景龍四年仲春之月也唐劉子玄撰

史通原序

劉子玄本名知幾楚州刺史脩之族孫也少與兄知柔俱以詞學知名弱冠舉進士授獲嘉主簿證聖年有制文武九品已上各言時政得失知幾上表陳四事詞甚切直是時官爵僭濫而法網嚴密士類競為趨進而多陷刑戮知幾乃著思慎賦以刺時且以見意鳳閣侍郎蘇味道李嶠見而歎曰陸機豪士所不及也知幾長安中累遷左史兼修國史擢拜鳳閣舍人修史如故景龍

初再轉太子中允依舊修國史時侍中韋巨源紀處訥
中書令楊再思兵部尚書宗楚客中書侍郎蕭至忠並
監修國史知幾以監修者多甚為國史之弊蕭至忠又
嘗責知幾著述無課知幾於是求罷史任奏記於至忠
云云文載
史通作時至忠惜其才不許解史任宗楚客嫉其正直

謂諸史官曰此人作書如是欲置我何地時知幾又著
史通子二十卷備論史策之體太子右庶子徐堅深重
其書嘗云居史職者宜置此書於座右知幾自負史才

常慨時無知己乃委國史於著作郎吳兢別撰劉氏家史十五卷譜考三卷推漢氏為陸終苗裔非堯之後彭城叢亭里諸劉出自宣帝子楚孝王囂曾孫司徒居巢侯劉愷之後不承楚王元交皆按據明白正前代所誤雖為流俗所譏學者服其該博初知幾每云若得受封必以居巢為名以紹司徒舊邑後以修則天實錄功果封居巢縣子又鄉人以知幾兄弟六人進士及第文學知名改其鄉里為高陽鄉居巢里景雲中累遷太子左

庶子兼崇文館學士仍依舊修國史加銀青光祿大夫
時玄宗在東宮知幾以名音類上名乃改子玄二年皇
太子將親釋奠於國學有司草儀注令從臣皆乘馬著
衣冠子玄進議曰古者自大夫已上皆乘車而以馬為
駢服魏晉以降迄乎隋代朝士又駕車馬歷代經史具
有其事不可一二言也至如李廣北征解鞍憩息馬援
南伐據鞍顧盼斯則鞍馬之設行於軍旅戎服所成賢
於便習者也按江左官至尚書郎而輒輕乘馬則為御

史所彈又顏延之罷官後好騎馬出入閭里當代稱其放誕此則專車憑軾可擐朝衣單馬御鞍宜從褻服求之近古灼然之明驗也自皇家撫運公草隨時至如陵廟巡謁王公冊命則盛服冠履乘彼輅車其士庶有衣冠親迎者亦時以服箱充馭在於他事無復乘車貴賤所行通用鞍馬已臣伏見比者鑾輿出幸法駕首途左右侍臣皆以朝服乘馬夫冠履而出只可配車而行今乘車既停而冠履不易可謂唯知其一而未知其二也

何者褻衣博帶草履高冠本非馬上所施自是車中之服必也韞而升鐙跣以乘鞍非唯不師古道亦自取驚今俗求諸折中進退無可且長裾廣袖襜如翼如鳴珮行組鏘鏘奕奕馳驟於風塵之內出入於旌榮之間儻馬有驚逸人從顛墜遂使屬車之右遺履不收清道之傍絳驂相續固以受嗤行路有損威儀今議者皆云秘閣有梁武帝南郊圖多有危冠乘馬者此則近代故事不得謂無其文臣按此圖是後人所為非當時所撰且

觀代間有古今圖畫者多矣如張僧繇畫羣公祖二疏而兵士有著芒屨者閭立本畫明君入匈奴而婦人有著帷帽者夫芒屨出於水鄉非京華所有帷帽創於隋代非漢宮所作議者豈可徵此二畫以為故實者乎由斯而言則梁南郊之圖義同於此又傳稱因俗禮貴緣情殷輅周冕規模不一秦冠漢佩用捨無常況我國家道軼百王功高萬古事有不便理資變通其乘馬衣冠竊謂宜從省廢臣懷此異議其來自久日不暇給未及

推揚今屬殿下親從齒冑將臨國學凡有衣冠乘馬皆
憚此行所以輒進狂言用申鄙見皇太子手令付外宣
行仍編入令以為常式開元初遷左散騎常侍修史如
故九年長子貺為太樂令犯事配流子玄詣執政訴理
上聞而怒之由是貶授安州都督府別駕子玄常知國
史首尾二十餘年多所撰述甚為當時所稱禮部尚書
鄭惟忠嘗問子玄曰自古以來文士多而史才少何也
對曰史才須有三長世無其人故史才少也三長謂才

也學也識也夫有學而無才亦猶有良田百頃黃金滿
贏而使愚者營生終不能致於貨殖者矣如有才而無
學亦猶思兼匠石巧若公輸而家無梗杵斧斤終不果
成其宮室者矣猶須好是正直善惡必書使驕主賊臣
所以知懼此則為虎傳翼善無可加所向無敵者矣脫
苟非其才不可叨居史任自負古已來能應斯目者罕
見其人時人以為知言子玄至安州無幾而卒年六十
一自幼及長述作不倦朝有論著必居其職預修三教

珠英文館詞林姓族系錄論孝經非鄭玄注老子無河
上公注修唐書實錄皆行於代有集三十卷後數年玄
宗勅河南府就家寫史通以進讀而善之追贈汲郡太
守尋又贈工部尚書謚曰文兄知柔少以文學政事厯
荆揚曾益宋海唐等州長史刺史戶部侍郎國子司業
鴻臚卿尚書右丞工部尚書東都留守卒贈太子少保
謚曰文代傳儒學之業嘗人以述作名其家子玄子貺
餽彙秩迅迥皆知名於時貺博通經史明天文律厯音

樂醫筭之術終於起居郎修國史撰六經外傳三十七
卷續說苑十卷太樂令壁記三卷真人肘后方三卷天
官舊事二卷餽右補闕集賢殿學士修國史著史例三
卷傳記三卷樂府古題解一卷彙給事中尚書右丞左
散騎常侍荆南長沙節度有集三卷秩給事中尚書右
丞國子祭酒撰政典三十五卷止戈記七卷至德新議
十二卷指要三卷論喪紀制度加籩豆許私鑄錢改制
國學事各在本志迅右補闕撰六說五卷迥諫議大夫

給事中有集五卷
貺子決滋彙子贊滋貞元中位至宰
輔贊觀察使自有傳

欽定四庫全書

史通卷一

唐 劉知幾 撰

內篇

六家第一

自古帝王編述文籍外篇言之備矣古往今來質文遞
變諸史之作不恒厥體推而為論其流有六一曰尚書
家二曰春秋家三曰左傳家四曰國語家五曰史記家
六曰漢書家今略陳其義列之於後

尚書家者其先出於太古易曰河出圖洛出書聖人則之故知書之所起遠矣至孔子觀書於周室得虞夏商周四代之典乃刪其善者定為尚書百篇孔安國曰以其上古之書謂之尚書尚書璇璣鈴曰尚者上也上天垂文以布節度如天行也王肅曰上所言下為史所書故曰尚書也惟此三說其義不同蓋書之所主本於號令所以宣王道之正義發話言於臣下故其所載皆典謨訓誥誓命之文至如堯舜二典直序人事禹貢一篇

惟言地理洪範總述灾祥顧命都陳喪禮茲亦為例不
純者也又有周書者與尚書相類即孔氏刊約百篇之
外凡為七十二章上自文武下終靈景甚有明允篤誠
典雅高義時亦有淺末恒說滓穢相叅殆似後之好事
者所增益也至若職方之言與周官無異時訓之說比
月令多同斯百王之正書五經之別錄者也自宗周既
殞書體遂廢迄乎漢魏無能繼者至晉廣陵相魯國孔
衍以為國史所以表言行昭法式至於人理常事不足

備列乃刪漢魏諸史取其美詞典言足為龜鏡者定以篇第纂成一家由是有漢尚書後漢尚書漢魏尚書凡為二十六卷至隋秘書監太原王邵又錄開皇仁壽時事編而次之以類相從各為其目勒成隋書八十卷尋其義例皆準尚書原夫尚書之所記也若君臣相對詞旨可稱則一時之言累篇咸載如言無足紀語無可述若此故事雖脫略而觀者不以為非爰逮中葉文籍大備必剪裁今文模擬古法事非改轍理涉守株故元舒

所撰漢魏等篇不行於代也若乃帝王無紀公卿缺傳
則年月失序爵里難詳斯並昔之所忽而今之所要如
君懋隋書雖欲祖述商周憲章虞夏觀其體制乃似孔
氏家語臨川世說可謂畫虎不成反類犬也故其書受
嗤當代良有以焉

春秋家者其先出於三代按汲冢璣語記太丁時事目
為夏殷春秋孔子曰疏通知遠書之教也屬辭比事春
秋之教也知春秋始作與尚書同時璣語又有晉春秋

記獻公十七年事國語云晉羊舌肸習於春秋悼公使傳其太子左傳昭二年晉韓宣子來聘見魯春秋曰周禮盡在魯矣斯則春秋之目事非一家至於隱沒無聞者不可勝載又按竹書紀年其所記事皆與魯春秋同孟子曰晉謂之乘楚謂之檮杌而魯謂之春秋其實一也然則乘與紀年檮杌其皆春秋之別名者乎故墨子曰吾見百國春秋蓋皆指此也逮仲尼之修春秋也乃觀周禮之舊法遵魯史之遺文據行事仍人道就敗以

明罰因興以立功假日月而定厯數藉朝聘而正禮樂
微婉其說隱晦其文為不刊之言著將來之法故能彌
厯千載而其書獨行又按儒者之說春秋也以事繫日
以日繫月言春以色夏舉秋以兼冬年有四時故錯舉
以為所記之名也苟如是則晏子虞卿呂氏陸賈其書
篇第本無年月而亦謂之春秋盖有異於此者也至太
史公著史記始以天子為本紀考其宗旨如昔春秋自
是為國史者皆用斯法然時移世異體式不同其所書

之事也皆言罕褒諱事無黜陟故馬遷所謂整齊故事耳安得比於春秋哉

左傳家者其先出於左邱明孔子既著春秋而邱明授經作傳蓋傳者轉也轉受經旨以授後人或曰傳者傳也

上傳去聲
下傳平聲

所以傳示來世案孔安國注尚書亦謂之

傳斯則傳者亦訓釋之義乎觀左傳之釋經也言見經文而事詳傳內或傳無而經有或經闕而傳存其言簡而要其事詳而博信聖人之羽翮而述者之冠冕也逮

孔子云沒經傳不作于時文籍唯有戰國策及太史公書而已至晉著作郎魯國樂資乃追采二史撰為春秋後傳其書始以周貞王續前傳魯哀公後至王赧入秦又以秦文王之繼周終於二世之滅合成三十卷當漢代史書以遷固為主而紀傳互出表志相重於文為煩頗難周覽至孝獻帝始命荀悅撮其書為編年體依附左傳著漢紀三十篇自是每代國史皆有斯作起自後漢至於高齊如張璠孫盛干寶徐賈裴子野吳均何之

元王邵等其所著書或謂之春秋或謂之紀或謂之略或謂之典或謂之志雖名各異大抵皆依左傳以為的準焉

國語家者其先亦出於左邱明既為春秋內傳又稽其逸文纂其別說分周魯齊晉鄭楚吳越八國事起自周穆王終於魯悼公列為春秋外傳國語合為二十一篇其文以方內傳或重出而小異然自古名儒賈逵王肅虞翻韋耀之徒並申以注釋治其章句此亦六經之流

三傳之亞也暨縱橫互起力戰爭雄秦兼天下而著戰
國策其篇有東西二周秦齊燕楚三晉宋衛中山合十
二國分為三十三卷夫謂之策者蓋錄而不序故即簡
以為名或云漢代劉向以戰國游士為策謀因謂之戰
國策至孔衍又以戰國策所書未為盡善乃引太史公
所記叅其異同刪彼二家聚為一錄號為春秋後語除
二周及宋衛中山其所畱者七國而已始自秦孝公終
於楚漢之際比於春秋亦盡二百四十餘年行事始衍

撰春秋時國語復撰春秋後語勒成二書各為十卷今
行於世者惟後語存焉按其書序云雖左氏莫能加世
人皆尤其不量力不度德尋衍之此義自比於邱明者
當謂國語非春秋傳也必方以類聚豈多曠乎當漢氏
失馭英雄角力司馬彪又錄其行事因為九州春秋州
為一篇合為九卷尋其體統亦近代之國語也自魏都
許洛二方鼎峙晉宅江淮四海幅裂其君雖號同王者
而地實諸侯所在史官記其國事為紀傳者則規模班

馬創編年者則議擬荀彧為是史漢之體大行而國語之風替矣

史記家者其先出於司馬遷自五經間行百家競列事跡錯糅前後乖舛至遷乃鳩集國史採訪家乘上起黃帝下窮漢武紀傳以統君臣書表以譜年爵合百三十卷因魯史舊名目之曰史記自是漢世史官所續皆以史記為名迄乎東京著書猶稱漢紀至梁武帝又勅其羣臣上自太初下終齊室撰成通史六百二十卷其書

自秦以上皆以史記為本而別採他說以廣異聞至兩漢已還則全錄當時紀傳而上下通達臭味相依又吳蜀二主皆入世家五胡及拓拔氏列於夷狄傳大抵其體皆如史記其所為異者唯無表而已其後元魏濟陰王暉業又著科錄二百七十卷其斷限亦起自古而終於宋年其編次多依倣通史而取其行事尤相似者共為一科故以科錄為號皇家顯慶中符璽郎隴西李延壽抄撮近代諸史南起自宋終於陳北始自魏卒於

隋合一百八十篇號曰南北史其君臣流例紀傳羣分
皆以類從各附於本國凡此諸作皆史記之流也尋史
記疆宇遼闊年月遐長而分以紀傳散以書表每論家
國一政而胡越相懸叙君臣一時而參商是隔此為其
體之失者也兼其所載多聚舊記時揔雜言

謂採世本
國語國策

等故使覽之者事罕異聞而語饒重出此撰錄之煩者
也况通史以降蕪累尤深遂使學者寧習本書而怠窺
新錄且撰次無幾而殘缺遂多可謂勞而無功述者所

宜深誠也

漢書家者其先出於班固馬遷撰史記終於今上自太
初已下闕而不錄班彪因之演成後記以續前篇至子
固乃斷自高祖盡于王莽為十二紀十志八表七十列
傳勒成一史目為漢書昔虞夏之典商周之誥孔氏所
撰皆謂之書夫以書為名亦稽古之偉稱尋其創造皆
準子長但不為世家改書曰志而已自東漢已後作者
相仍皆襲其名號無所變革唯東觀曰記三國曰志然

稱謂雖別而體制皆同歷觀自古史之所載也尚書紀
周事終秦繆春秋述魯文止哀公紀年下逮於魏亡史
記唯論於漢始如漢書者究西都之首末窮劉氏之廢
興包舉一代撰成一書言皆精練事甚該密故學者尋
討易為其功自爾迄今無改斯道於是考茲六家商榷
千載蓋史之流品亦窮之於此矣而朴散淳銷時移世
異尚書等四家其體久廢所可祖述者唯左氏及漢書
二家而已

史通卷一

欽定四庫全書

史通卷二

唐 劉知幾 撰

內篇

二體第二

三五之代書有典墳悠哉邈矣不可得而詳自唐虞已下迄于周是為古文尚書然世猶淳質文從簡略求諸備體固已闕如既而邱明傳春秋子長著史記載筆之體於斯備矣後來繼作相與因循假有改張變其名目

區域有限孰能踰此蓋荀悅張璠邱明之黨也班固華
嶠子長之流也唯二家各相矜尚必辨其利害可得而
言之夫春秋者繫日月而為次列時歲以相續中國外
夷同年共世莫不備載其事形于目前理盡一言語無
重出此其所以為長也至於賢士貞女高才雋德事當
衝要者必盱衡而備言跡在沈冥者不枉道而詳說如
絳縣之老杞梁之妻或以酬晉卿而獲記或以對齊君
而見錄其有賢如柳惠仁若顏回終不得彰其名氏顯

其言行故論其細也則纖芥無遺語其麓也則邱山是棄此其所以為短也史記者紀以包舉大端傳以委曲細事表以譜列年爵志以總括遺漏逮於天文地理國典朝章顯隱必該洪纖靡失此其所以為長也若乃同為一事分在數篇斷續相離前後屢出於高紀則云語在項傳於項傳則云事具高紀又編次同類不求年月後生而擢居首秩先輩而抑歸末章遂使漢之賈誼將楚屈原同列魯之曹沫與燕荊軻並編此其所以為短

也考茲勝負互有得失而晉世干寶著書乃盛譽邱明而深抑子長其義云能以三十卷之約括囊二百四十年之事靡有遺也尋其此說可謂勁挺之詞乎按春秋時事入於左氏所書者蓋三分得其一耳邱明自知其略也故為國語以廣之然國語之外尚多亡逸安得言其括囊靡遺者哉向使邱明世為史官皆倣左傳也至於前漢之嚴君平鄭子真後漢之郭林宗黃叔度晁錯董生之對策劉向谷永之上書斯並德冠人倫名馳海

內識洞幽顯言窮軍國或以身隱位卑不預朝政或以
文煩事博難為次序皆略而不書斯則可也必情有所
恡不加刊削則漢氏之志傳百卷併列於十二紀中將
恐碎瑣多蕪闌單失力者矣故班固知其若此設紀傳
以區分使其歷然可觀綱紀有別荀悅厭其迂闊又依
左氏成書剪裁班史篇纔三十歷代保之有踰本傳然
則班荀二體角力爭先欲廢其一固亦難矣後來作者
不出二途故晉史有王虞而副以干紀宋書有徐沈而

分為裴略各有其美並行于世異夫令昇之言唯守一家而已

載言第三

古者言為尚書事為春秋左右二史分尸其職蓋桓文作霸糾合同盟春秋之時事之大者也而尚書闕紀秦師敗績繆公誡誓尚書之中言之大者也而春秋靡錄此則言事有別斷可知矣逮左氏為書不遵古法言之與事同在傳中然而言事相兼煩省合理故使讀者尋

繹不倦覽諷忘疲至於史漢則不然凡所色舉務存恢
博文辭之記繁富為多是以賈誼晁錯董仲舒東方朔
等傳唯止錄言罕逢載事夫方述一事得其綱紀而隔
以大篇分其次序遂令披閱之者有所懵然後史相承
不改其轍交錯紛擾古今是同按遷固列君臣於紀傳
統遺逸於表志雖篇名甚廣而言獨無錄愚謂凡為史
者宜於表志之外更立一書若人主之制冊詔令羣臣
之章表移檄收之紀傳悉入書部題為制冊章表書以

類區別他皆倣此亦猶志之有禮樂志刑法志又詩人之什自成一家故風雅比興非三傳所取自六義不作文章生焉若韋孟諷諫之詩揚雄出師之頌馬卿之書封禪賈誼之論過秦諸如此文皆施紀傳竊謂宜從古詩例斷入書中亦猶舜典列元首之歌夏書包五子之詠者也夫能使史體如是庶幾春秋尚書之道備矣昔干寶議撰晉史以為宜準左邱明其臣下委曲仍為譜注于時議者莫不宗之故前史之所未安後史之所宜

草是用敢同有識爰立茲篇庶世之作者覩其利害如謂不然請俟來哲

本紀第四

昔汲冢竹書是曰紀年呂氏春秋肇立紀號蓋紀者綱紀庶品網羅萬物考篇目之大者其莫過於此乎及司馬遷之著史記也又列天子行事以本紀名篇後世因之守而勿失譬夫行夏時之正朔服孔門之教義者雖地遷陵谷時變質文而此道常行終莫之能易也然遷

之以天子為本紀諸侯為世家斯誠謹矣但區域既定而疆理不分遂令後之學者罕詳其義按姬自后稷至於西伯嬴自伯翳至於莊王爵乃諸侯而名隸本紀若以西伯莊王以上別作周秦世家持殷紂以對武王拔秦始以承周赧使帝王傳授昭然有別豈不善乎必以西伯以前其事簡約別加一目不足成篇則伯翳之至莊王其書先成一卷而不共世家等列輒與本紀同編此尤可怪也項羽僭盜而死未得成君求之於古則齊

無知衛州吁之類也安得諱其名字呼之曰王者乎春秋吳楚僭擬書如列國假使羽竊帝名正可抑同羣盜況其名曰西楚號止霸王者乎霸王者即當時諸侯諸侯而稱本紀求名責實再三垂繆蓋紀之為體猶春秋之經繫日月以成歲時書君上以顯國統曹武雖曰人臣實同王者以未登帝位國不建元陳志權假漢年編作魏紀亦猶兩漢書首列秦莽之正朔也後來作者宜準於斯而陸機晉書列紀三祖直序其事竟不編年年

既不編何紀之有夫位終北面一概人臣儻追加大號
止入傳限是以宏嗣吳史不紀孫和緬求故實非無往
例逮伯起之次魏書乃編景穆於本紀以戾國虛謚間
廁武昭欲使百世之中若為魚貫又紀者既以編年為
主唯叙天子一人有大事可書者則見之於年月其書
事委曲付之列傳此其義也如近代述者魏著作李安
平之徒其撰魏齊二史

魏彥淵撰後魏書
李百藥撰北齊書

於諸帝篇或

雜載臣下或兼言他事巨細畢書洪纖備錄

如彥淵帝
紀載沙苑

之捷百藥帝紀述
淮南之敗是也

全為傳體有異紀文迷而不悟無乃

太甚世之讀者幸為詳焉

世家第五

自有王者便置諸侯列以五等疏為萬國當周之東遷
王室大壞於是禮樂征伐自諸侯出迄乎秦世分為七
雄司馬遷之記諸國也其編次之體與本紀不殊蓋欲
抑彼諸侯異乎天子故假以地稱名為世家按世家之
為義也豈不以開國承家世代相續至如陳勝起自羣

盜稱王六月而死子孫不嗣社稷靡聞無世可傳無家
可宅而以世家為稱豈當然乎夫史之篇目皆遷所創
豈以自我作故而名實無準且諸侯大夫家國本別三
晉之與田氏自未為君而前齒列陪臣屈身藩后而前
後一統俱歸世家使君臣相雜升降失序何以責季孫
之八佾舞庭管氏之三歸反坫又列號東帝抗衡西秦
地方千里高視六國而沒其本號唯以田完制名

謂田
完世

也家求之人情孰謂其可當漢氏之有天下也其諸侯與

古不同夫古者諸侯皆即位建元專制一國綿綿瓜瓞
卜世長久至於漢代則不然其宗子稱王者皆受制京
邑自同州郡異姓封侯者必從官天朝不臨方域或傳

國唯止一身或襲爵纔經數世雖名班胙土

蜀本班下有爵字宋

本無

而禮異人君必編為世家實同列傳而馬遷強加別

錄以類相從雖得畫一之宜詎識隨時之義蓋班漢知
其若是釐革前非至如蕭曹茅土之封荆楚葭莩之屬
並一槩稱傳無復世家事勢當然非矯枉也自茲已降

年將四百及魏有中夏而揚益不賓終亦受屈中朝見
稱僞主為史者必題之以紀則上通帝王牘之以傳則
下同臣妾梁主勅撰通史定為吳蜀世家持彼僭君比
諸列國去太甚其得折中之規乎次有子顯齊書北
編魏虜牛弘周史南記蕭譽考其傳體宜曰世家但今
古著書通無此稱用使馬遷之冊湮沒不行班固之名
相傳靡易者矣

列傳第六

夫紀傳之興肇於史漢蓋紀者編年也傳者列事也編年者厯帝王之歲月猶春秋之經列事者錄人臣之行狀猶春秋之傳春秋則傳以解經史漢則傳以釋紀尋茲例草創始自子長而朴略猶存區分未盡如項王立傳而以本紀為名非唯羽之僭盜不可同於天子且推其序事皆作傳言求謂之紀不可得也或曰遷紀五帝夏殷亦皆列事而已子曾不之怪何獨尤於項紀哉對曰不然夫五帝之與夏殷也正朔相承子孫遞及雖無

年可著紀亦何傷如項羽者事起秦餘身終漢始殊夏氏之后羿似黃帝之蚩尤譬諸閨位容可列紀方之駢拇難以成編且夏殷之紀不引他事夷齊諫周實當紂日而析為列傳不入殷篇項紀則上下同載君臣交雜紀名傳體所以成強夫紀傳之不同猶詩賦之有別而後來繼作亦多所未詳按范曄漢書紀后妃六宮其實傳也而謂之為紀陳壽國志載孫劉二帝其實紀也而呼之曰傳考數家之所作其未達紀傳之情乎苟上智

猶且若斯則中庸故可知矣又傳之為體大抵相同而述者多方有時而異耳如二人行事首尾相隨則有一傳兼書包括令盡若陳餘張耳合體成篇陳勝吳廣相參並錄是也亦有事跡雖寡名行可崇寄在他篇為其標冠若商山四皓事列王陽之首廬江毛義名在劉平之上是也自茲已後史氏相承述作雖多斯道都廢其同於古者惟有附出而已尋附出之為義攀列傳以垂名若紀季之入齊顯史之事魯皆附庸自託得廁於朋

流然世之求名者咸以附出為小蓋以其因人成事不足稱多故也竊以書名竹素豈限詳略但問其事竟如何耳借如邵平紀信沮授陳容或運一異謀樹一奇節並能傳之不朽人到于今稱之豈假編名作傳然後播其遺烈也嗟乎自班馬以來獲書於國史者多矣其間則有生無令問死無異跡異一作遺用使游談者靡徵其事講習者罕記其名而虛傳班史妄占篇目若斯人者可勝紀哉古人以沒而不朽為難蓋為此也

--	--	--	--	--	--	--	--

史通卷二

欽定四庫全書

史通卷三

唐 劉知幾 撰

內篇

表歷第七

蓋譜之建名起於周氏表之所作因譜象形故桓君山有云太史公三代世表旁行斜正並效周譜此其證歟夫以表為文用述時事施彼譜歷容或可取載諸史傳未見其宜何則易以六爻窮變化經以一字成褒貶傳

色五始詩含六義故知文尚簡要語惡煩蕪何必歎曲
重沓方稱周備觀馬遷史記則不然夫天子有本紀諸
侯有世家公卿已下有列傳至於祖孫昭穆年月職官
各在其篇具有其說用相考覈居然可知而重列之以
表成其煩費豈非謬乎且表次在篇第編諸卷軸得之
不為益失之不為損用使讀者莫不先看本紀越至世
家表在乎其間絨而不視語其無用可勝道哉既而班
東二史

東謂東
觀漢記

各相祖述迷而不悟無異逐狂必曲為

銓擇強加引進則列國年表或可存焉何者當春秋戰國之時天下無主羣雄錯峙各自年世若申之於表以統其時則諸國分年一時盡見如兩漢御厯四海成家公卿既為臣子王侯纔比郡縣何用表其年數以別於天子者哉又有甚於斯者異哉班氏之人表也區別九品網羅千載論世則異時語姓則他族自可方以類聚物以羣分使善惡相從先後為次何藉而為表乎且其書上自庖犧下窮嬴氏不言漢事而編入漢書鳩居鵲

巢燕施松上附生疣贅不知剪截何斷而為限乎至法
盛書載中興改表為注名目雖巧蕪累亦多當晉氏播
遷南據揚越魏宗勃起北雄燕代其間諸偽十有六家
不附正朔自相君長崔鴻著表頗有甄明比於史漢羣
篇其要為切者矣若諸子小說編年雜記如常昭洞紀
陶弘景帝王厯皆因表而作用成其書既非國史之流
故存而不述

書志第八

并序

天文志
五行志
雜志

藝文志

夫刑法禮樂風土山川求諸文籍出於三禮及班馬著
史別裁書志考其所記多效禮經且紀傳之外有所不
盡隻事片文於斯備錄語其通博信作者之淵海也原
夫司馬遷曰書班固曰志東觀曰記華嶠曰典張勃曰
錄何法盛曰說名目雖異體統不殊亦猶楚謂之檮杌
晉謂之乘魯謂之春秋其義一也於其編次則有前曰
平準後云食貨古號河渠今稱溝洫析郊祀為宗廟分
禮樂為威儀懸象出於天文郡國生於地理如斯變革

不可勝計或名非而物是或小異而大同但作者愛奇
恥於仍舊必尋源討本其歸一揆也若乃五行藝文班
補子長之闕百官輿服謝拾益堅之遺王隱後來加以
瑞異魏收晚進宏以釋老斯則自我作故出乎臆求
諸厯代不過一二者焉大抵志之為篇其流十五六家
而已其間則有妄入編次虛張部帙而積習已久不悟
其非亦有事應可書宜別標篇題音第而古來作者曾未
覺察今略陳其義列於下云

已上書
志序

夫兩曜百星麗於玄象非如九州萬國廢置無恒故海
田可變而景緯無易古之天猶今之天也今之天即古
之天也必欲刊之國史施於何代不可也但史記包括
所及區域綿長故書有天官讀者竟忘其誤擁而為論
未見其宜班固因循復以天文作志志無漢事而隸入
漢書尋篇考限覩其垂越者矣降及有晉迄于隋氏或
地止一隅或年纔二世而彼蒼列志其篇倍多流宕忘
歸不知紀極方於漢史又孟堅之罪人也切以國史所

書宜述當時之事必為志而論天象也但載其時彗孛
氛祲薄食晦明裨竈梓慎之所占京房李邵之所候至
如熒惑退舍宋公延齡中台告圻晉相速禍星集潁川
而賢人聚月犯少微而處士亡如斯之類志之可也若
乃體分濛濛色著青蒼丹曦素魄之躔次黃道紫宮之
分野既不預於人事輒編之於策書故曰刊之國史施
於何代不可也其間惟有泰山松沈約蕭子顯魏收等
數家頗覺其非不遵舊例凡所記錄多合事宜寸有所

長賢於班馬遠矣

已上天
文志

伏羲已降文籍始備逮於戰國其書五車傳之無窮是
曰不朽夫古之所制我有何力而班漢定其流別編為
藝文志論其妄載事等上篇

謂天
文志

續漢已還祖述不暇

夫前志已錄而後志仍書篇目如舊頻煩互出何異以
水濟水誰能飲之者乎且漢書之志天文藝文也蓋欲
廣列篇名示存書體而已文字既少披閱易周故雖乖
節文而未甚穢累既而後來繼述其流日廣天文則星

占月會渾圖周髀之流藝文則四部七錄中經秘閣之
輩莫不各踰三篋自成一家史臣所書宜其輟簡而近
世有著隋書者乃廣包衆作勒成二志騁其繁富百倍
前修非唯循覆車而重軌亦復加闊眉以半額者矣但
自史之立志非復一門其理有不安多從沿革唯藝文
一體古今是同詳求厥義未見其可愚謂凡撰志者宜
除此篇必不能去當變其體近者宋孝王關東風俗傳
亦有墳籍志其所錄皆鄴下文儒之士讐校之司所列

書名唯取當時撰者習茲楷則庶免譏嫌語曰雖有絲
麻無棄菅蒯於宋王得之矣

已上藝文志

夫灾祥之作以表吉凶此理昭昭不易誣也然則麒麟
闕而日月食鯨鮪死而彗星出河變應於千年山崩由
於朽壤又語曰太歲在丑乞漿得酒太歲在巳販妻鬻
子則知吉凶遁代如盈縮循環此乃闕諸天道不復繫
乎人事且周王決疑龜焦著折宋皇誓衆竿壞幡亡梟
止梁師之營鵬集賈生之舍斯皆妖灾著象而福祿來

鍾愚智不能知晦明莫之測也然而古之國史聞異則書未必皆審其休咎詳其美惡也故諸侯相赴有異不為灾見於春秋其事非一洎漢興儒者乃考洪範以釋陰陽其事也如江璧傳於鄭谷遠應始皇卧柳植於上林近符宣帝門樞白髮元后之祥柱樹黃雀新都之讖舉夫一二良有可稱至於蜚蜮蜾蠃震食崩圻隕雨霜雹大水無冰其所證明實皆迂闊故當春秋之世其在於魯也如有旱雩舛候螟螣傷苗之屬是時或秦人歸

祿或毛伯錫命或滕邾入朝或晉楚來聘皆持此恒事
應彼咎徵旻穹垂謫厥罰安在探賸索隱其可略諸且
史之記載難以周悉近者宋氏年唯五紀地止江淮書
滿百篇號為繁富作者猶廣之以拾遺加之以語錄况
彼春秋之所記也二百四十年行事夷夏之國盡書而
經傳集解卷纔三十則知其言所略蓋亦多矣而漢代
儒者羅災眚於二百年外討符會於三十卷中安知事
有不應於人應人而失其事何得苟有變而必知其兆

者哉若乃採前文而改易其說謂王札子之作亂在彼

成年

春秋成公元年二月無冰董仲舒以為其時王札子殺召伯毛伯案今春秋經札子殺召毛事在宣

十五年非成公時

夏徵舒之構逆當夫昭代

春秋昭公九年陳災董仲舒以為楚

莊王為陳討夏徵舒因滅陳陳之臣子毒恨故致火災按楚莊王之滅陳在宣十一年如昭九年所滅者乃楚

靈王時是莊王卒恭王立恭王卒康王立康王卒夷教立夷教卒靈王立相去凡五世在五行志上卷中楚

莊作霸荆國始僭稱王

春秋桓公三年日有食之既京房易傳以為後楚莊稱王兼地

千里按自武王始僭號歷文成繆三王始至於莊然則楚之稱王已四世矣何得言莊始稱哉又魯桓薨後世

歷莊閔釐文者凡五君而楚莊作霸安有桓三年日食而應之邪

高宗諒陰臺都實生

桑穀

尚書伊陟相太戊臺有桑穀共生劉向以為殷道衰高宗承弊而起盡諒陰之哀天下應之既獲顯

榮急於政事國將危亡故桑穀之異見按太戊崩其後嗣有仲丁河亶甲祖乙盤庚凡歷五世始至武丁即高

宗是也桑穀自太戊時生非高宗事高又本不都於臺

晉悼臨國六卿專政以君

事臣

董仲舒以為成公十七年六月甲戌朔日有食之時宿在畢晉家象也晉厲公後莫敢責大夫六卿

遂相與比周專晉國君還事之按春秋成公十二月丁巳朔日食非是六月

魯僖末年三桓

世官殺嫡立庶

春秋僖公三十三年十二月隕霜不殺草劉向以為是時公子遂專權三桓始世

官向又曰嗣君微失柄來事之象也又釐公二十九年秋大雨雹劉向以為釐公末年信用公子遂專權自恣至於殺君故陰脅陽之象見釐公不悟遂終專權後二年殺子赤立宣公按此事乃文公未出不是僖公時也

欽定四庫全書

卷三

遂即東門襄仲赤文公太子即惡也

斯皆不憑章句直取胃懷或以前為

後以虛為實移的就箭曲取相諧掩耳盜鍾自云無覺

詎知後生可畏來者難誣者邪又品藻羣流題目庶類

謂莒為大國菽為强草鶯著素色負蟻匪中國之蟲

春秋

莊公二十九年有蜚劉歆以為蜚負蟻也劉向以為非中國所有南越盛暑男女同川澤淫風所生是時莊取齊淫女為夫人既入淫於兩叔故蜚 鵲為夷狄之鳥

至按負蟻中國所生不獨出南越 鵲為夷狄之鳥

春秋昭公二十五年鵲來巢劉向以為夷狄之禽按鵲鵲中國皆有唯不踰濟水耳事見周官 如斯詭妄不可殫論而班固就加纂次曾靡銓擇因以五行

編而為志不亦惑乎且每有叙一灾推一怪董京之說

前後相反

桓公三年日有食之董仲舒劉向以為魯宋殺君易許田劉歆以為晉曲沃莊伯殺晉侯

京房以為後楚莊稱王兼地千里也

向歆之解父子不同

莊公七年夜中星隕如雨劉向

以為夜中者即中國也劉歆以為畫象中國夜象夷狄劉向又以為域生南越劉歆以為咸暑所生非自越來也遂乃雙載其文兩存厥理言無準的事益煩費豈所

謂撮其機要收彼菁華者乎自漢中興已還迄于宋齊其間司馬彪臧榮緒沈約蕭子顯相承載筆竟志五行雖未能盡善而大較多實何者如彪之徒皆自以名慙

漢儒才劣班史凡所辨論務守常途旣動遵繩墨故理
絕河漢兼以古書從略求徵應者難該近史尚繁考祥
符者易洽此昔人所以言有垂越後進所以事不精審
也然則天道遼遠禪竈焉知日食不常文伯所對至如
梓慎之占星象趙達之明風角單颺識魏祚於黃龍董
養徵晉亂於蒼烏斯皆肇彰先覺取驗將來言必有中
語無虛發苟誌諸竹帛其誰曰不然若乃前事已往後
來追證課彼虛說成此有詞多見其老生常談徒煩翰

墨者矣子曰盖有不知而作之者我無是也

色曰時人有穿鑿妄

作篇籍者故云然

又曰君子於其所不知盖闕如也又曰知之

為知之不知為不知是知也嗚呼世之作者其鑒之哉

談何容易駟不及舌無為强著一言受嗤千載也

已上五行

志

或以為天文藝文雖非漢書所宜取而有廣聞見難為

刪削也對曰苟事非其限而越理來書自可觸類而長

于何不錄又有要於此者今可得而言焉夫圓首方足

含靈受氣吉凶形於相貌貴賤彰於骨法生人之所欲
知也四支六府病瘵所纏苟詳其孔穴則砭灼無悞此
養生之尤急且身名並列親疎自明豈可近昧形骸而
遠求辰象旣天文有志何不為人形志乎茫茫九州言
語各異大漢輜軒之使譯導而通足以驗風俗之不同
示皇威之廣被且事當炎運尤相關涉爾雅釋物非無
往例旣藝文有志何不為方言志乎但班固綴孫卿之
詞以序刑法探孟軻之語用裁食貨五行出劉向洪範

藝文取劉歆七略因人成事其目遂多至若許負相經揚雄方言並當時所重見傳流俗若加以二志幸有其書何獨捨諸深所未曉厯觀衆史諸志列名或前略而後詳或古無而今有雖遞補所闕各自以為工擢而論之皆未得其最蓋可以為志者其道有三焉一曰都邑志二曰氏族志三曰方物志何者京邑翼翼四方是則千門萬戶兆庶仰其威神虎踞龍蹠帝王表其尊極兼復土階卑室好約者所以安人阿房未央窮奢者由其

敗國此則其惡可以誡世其善可以勸後者也且宮闕
制度朝廷軌儀前王所為後王取則故齊府肇建誦魏
都以立宮代國初遷寫吳京而樹闕故知經始之義卜
揆之功經百王而不易無一日而可廢也至如兩漢之
都咸洛晉宋之宅金陵魏徙伊瀍齊居漳滏隋氏二世
分置兩都此並規模宏遠名號非一凡為國史者宜各
撰都邑志列於輿服之上金石草木編紵絲枲之流鳥
獸蟲魚齒草羽毛之類或百蠻攸稅或萬國是供夏書

則編於禹貢周書則託於王會亦有圖形九牧之鼎列
狀四荒之經觀之者擅其博聞學之者騁其多識自漢

氏拓境無國不賓則有邛竹傳節錫醬流味大宛輸其

善馬

蜀本作獻
宋本作輸

條支致其巨雀爰及魏晉迄于周隋咸

亦遐邇來王任土作貢異物歸於計吏奇名顯於職方

凡為國史者宜各撰方物志列於食貨之首帝王苗裔

公侯子孫餘慶所鍾百世無絕能言吾祖鄭子見師於

孔公不識其先籍談取諛於姬后故周撰世本式辨諸

宗楚置三閭實掌王族逮乎晚葉譜學尤煩用之於官
可以品藻士庶施之於國可以甄別華夷自劉曹受命
雍豫為宅世胄相承子孫蕃衍及永嘉東渡流寓揚越
代氏南遷草夷從夏於是中朝江右南北混淆華壤邊
民虜漢相雜隋有天下文軌大同江外山東人物殷湊
其間高門素族蜀本作貴
宋本作素非復一家郡正州都世掌其
任凡為國史者宜各撰氏族志列於百官之下蓋自都
邑已降氏族而往實為志者所宜先而諸史竟無其錄


如休文宋籍廣以符瑞伯起魏篇加之釋老徒以不急
為務曾何足云惟此數條粗加商略得失利害從可知
矣庶夫後來作者擇其善而行之

已上
雜志

或問曰子以都邑氏族方物宜各續次以志名篇夫史
之有志多憑舊說苟世無其錄則闕而不編此都邑之
流所以不果列志也對曰按帝王建國本無恒所作者
記事亦在相時遠則漢有三輔典近則隋有東都記於
南則有宋南徐州記晉宮闕名於北則有洛陽伽藍記

鄴都故事蓋都邑之事盡在是矣譜牒之作盛於中古
漢有趙岐三輔決錄晉有摯虞姓族記江左有兩主百
家譜中原有方思殿格蓋氏族之事盡在是矣自沈瑩
著臨海水土周處撰陽羨土風厥類衆夥諒非一族是
以地理為書陸澄集而難盡水經加注鄴元編而不窮
蓋方物之事盡在是矣凡此諸書代不乏作必聚而為
志奚患無文譬夫涉海求魚登山採木至於鱗介脩短
柯條巨細蓋在擇之而已苟為漁人匠者何慮山海之

貧罄哉



史通卷三

欽定四庫全書

史部
史通卷五

詳校官編修臣錢樾

編修臣程嘉謨覆勘

覆校官主事臣李駿

校對官中書臣袁文邵

謄錄監生臣康傑

欽定四庫全書

史通卷四

唐 劉知幾 撰

內篇

論贊第九

春秋左氏傳每有發論假君子以稱之二傳云公羊子穀梁子史記云太史公既而班固曰讚荀悅曰論東觀曰序謝承曰詮陳壽曰評王隱曰議何法盛曰述揚雄曰譚劉昫曰奏袁宏裴子野自顯姓名皇甫謐葛洪列

其所號史官所撰通稱史臣其名萬殊其義一揆必取便於時則總歸論焉夫論者所以辯疑惑釋凝滯若愚智共了固無俟商榷邱明君子曰者其義實在於斯司馬遷始限以篇終各書一論必理有非要則強生其文史論之煩實萌於此夫擬春秋以成史持論尤宜闊略其有本無疑事輒設論以裁之此皆徇筆端苟銜文彩嘉辭美句寄諸簡冊豈知史書之大體載削之指歸者哉必尋其得失考其異同子長淡泊無味承祚懦緩不

切賢才間出隔世同科孟堅辭惟溫雅理多愜當其尤
美者有典誥之風翩翩弈弈良可詠也仲豫義理雖長
失在繁富自茲以降流宕忘返大抵皆華多於實理少
於文鼓其雄辭誇其儷事必擇其善者則干寶范曄裴
子野是其最也沈約臧榮緒蕭子顯抑其次也孫安國
都無足採習鑿齒時有可觀若袁彥伯之務飾立言謝
靈運之虛張高論王卮無當曾何足云王邵志在簡直
言兼鄙野苟得其理遂忘其文觀過知仁斯之謂矣大

唐修晉書作者皆當代詞人遠棄史班近宗徐庾夫以飾彼輕薄之句而編為史籍之文無異加粉黛於壯夫服綺紈於高士者矣史之有論也蓋欲事無重出省文可知如太史公曰觀張良貌如美婦人耳項羽重瞳豈舜苗裔此則別加他語以補書中所謂事無重出者也又如班固贊曰萬石君之為父浣衣君子非之楊王孫袒葬賢於秦始皇遠矣此則片言如約而諸義甚備所謂省文可知也及後來讚語之作多錄紀傳之言具有

所異唯加文飾而已至於甚者則天子操行具諸紀末
繼以論曰接武前修紀論不殊徒為再列馬遷序傳後
歷寫諸篇各叙其意既而班固變為詩體號之曰述范
曄改彼述名呼之以贊尋述贊為例篇有一章事多者
則約之以使少理小者則張之以令大名實多與詳略
不同且欲觀人之善惡史之褒貶蓋無假於此也然固
之總述合在一篇使其條貫有序歷然可閱蔚宗後書
實同班氏乃各附本事書於卷末篇目相離斷絕失次

而後生作者不悟其非如蕭李南北史

蕭子顯
李百藥

大唐新

修晉史皆依范書誤本篇終有贊夫每卷立論其煩已
多而嗣論以贊為贖彌甚亦有文士製碑序終而續以
銘曰釋氏演法義盡而宣以偈言苟撰史若斯難與議
夫簡要者矣至若與奪乖宜是非失中如班固之深排
賈誼范曄之虛美隗囂陳壽謂諸葛不逮管蕭魏收稱
爾朱可方伊霍或言傷其實或擬非其倫必備加擊難
則五車難盡故略陳梗槩一言以蔽之

序例第十

孔安國有云序者所以序作者之意也竊以書列典謨詩含比興若不先序其意難以曲得其情故每篇有序敷暢厥義降逮史漢以記事為宗至於表志雜傳亦時復立序文兼史體狀若子書然可與誥誓相叅風雅齊列矣逮華嶠後漢多同班氏如劉平江革等傳其序先言孝道次述毛義養親此則前漢王貢傳體其篇以四皓為始也嶠言辭簡質叙致溫雅味其宗旨亦孟堅之

亞歟爰洎范曄始革其流遺棄史才矜銜文彩後來所作他皆若斯於是遷固之道忽諸微婉之風替矣若乃后妃列女文苑儒林凡此之流范氏莫不列序夫前史所有而我書獨無世之作者以為耻愧故上自晉宋下及陳隋每書必序課成其數蓋為史之道以古傳今古既有之今何為者濫觴肇跡容或可觀累屋重架無乃太甚譬夫方朔始為客難續以賓戲解嘲枚乘首唱七發加以七章七辨音辭雖異旨趣皆同此乃讀者所厭

聞老生之恒說也夫史之有例猶國之有法國之無法則上下靡定史之無例則是非莫準昔夫子修經始發凡例左氏立傳顯其區域科條一辨彪炳可觀降及戰國迄乎有晉年逾五百史不乏才雖其體屢變而斯文終絕唯令昇先覺遠述邱明重立凡例勒成晉紀鄧孫已下遂躡其蹤史例中興於斯為盛若沈宋之志序蕭齊之序錄雖皆以序為名其實例也必定其臧否徵其善惡干寶范曄理切而多功鄧粲道鸞詞煩而寡要子

顯雖文傷蹇躓而義甚優長斯一二家皆序例之美者
夫事不師古匪說攸聞苟模楷曩賢理非可諱而魏叔
作例全取蔚宗貪天之功以為己力異夫范依叔駿班
習子長攘袂公行不陷穿窬之罪也蓋凡例既立當與
紀傳相符按唐朝晉書例云凡天子廟號惟書於卷末
依檢孝武崩後竟不言廟曰烈宗又按百藥齊書例云
人有本字行者今並書其名依檢如高慎斛律光之徒
多所仍舊謂之仲密明月此並非言之難行之難也及

晉齊史例皆云坤道卑柔中宮不可為紀今編同列傳以戒牝雞之晨切惟錄皇后者既為傳體自不可加以紀名二史之以后為傳雖云允愜而解釋非理成其偶中所謂畫蛇而加足反失杯中之酒也至於題目失據褒貶多違斯並散在諸篇此可得而略矣

題目第十一

上古之書有三墳五典八索九邱其次有春秋尚書禱杌志乘自漢已下其流漸繁大抵史名多以書記紀略

為主後生祖述各從所好沿革相因循環遞習蓋區域有限莫踰於此焉至孫盛有魏氏春秋孔衍有隋尚書陳壽王邵曰志何之元劉璠曰典此又好奇厭俗習舊捐新雖得稽古之宜未得從時之義擢而論之其編年月者謂之紀列記傳者謂之書取順於時斯為最也夫名以定體為實之賓苟失其途有乖至理按呂陸二氏

呂不韋
陸賈

各著一書惟次篇章不繫時月此乃子書雜記

而皆號曰春秋魚豢姚察著魏梁二史巨細畢載無累

甚多而俱牘之以略考名責實奚其與歟若乃史傳雜
篇區分類聚隨事立號諒無恒規如馬遷撰皇后傳而
以外戚命章按外戚憑皇后以得名猶宗室因天子而
顯稱也若編皇后而曰外戚傳則書天子而曰宗室紀
可乎班固撰人表以古今為目尋其所載也皆自秦而
往非漢之事古誠有之今則安在子長史記別稱八書
孟堅既以漢為書不可更標書號改書為志義在互文
而何氏中興易志為記此則貴於革舊未見其能夫戰

爭方殷雄雌未決則有不奉正朔自相君長必國史為傳宜別立科條至如陳項諸雄寄編漢籍董袁羣賊附列魏志既同臣子之例孰辨彼此之殊惟東觀以平林下江諸人列為載記賴後來作者莫之遵効逮新晉始以十六國主持載記表名可謂擇善而行巧於師古者矣觀夫舊史列傳題卷靡恒文少者則具出姓名若司馬相如東方朔是也字煩者惟書姓氏若毋將蓋陳衛諸葛傳是也必人多而姓同者則結定其數若二袁四

張二公孫傳是也如此標格足為詳審至范曄舉例始
全錄姓名歷短行於卷中叢細字於標外其子孫附出
者注於祖先之下乃類俗之文按孔目藥草經方煩碎
之至孰過於此切以周易六爻義存象內春秋萬國事
具傳中讀者研尋篇終自曉何必開帙解帶便令昭然
滿目也自茲以降多師蔚宗魏收因之則又甚矣其有
魏世隣國編於魏史者於其人姓名之上又列之以邦
域申之以職官至如江東帝王則云僭晉司馬廩島夷

劉裕河西酋長則云私置涼州牧張實私署涼王李暠
此皆篇中所具又於卷首具列必如收意使其撰兩漢
書三國志題諸盜賊傳亦當云僭西楚項羽偽寧朔王
隗囂自餘陳涉張步劉璋袁術其位號一二具言無所
不盡也蓋法令滋章古人所慎若范魏之裁篇目可謂
滋章之甚者乎苟忘彼大體好茲小數難與議夫婉而
成章一字以為褒貶者矣

斷限第十二

夫書之立約其來尚矣如尼父之定虞書也以舜為始而云粵若稽古帝堯邱明之傳魯史也以隱為先而云惠公元妃孟子此皆正其疆里開其首端因有沿革遂相交互事勢當然非為濫軼也過此已往可謂狂簡不知所裁者焉又子曰不在其位不謀其政若漢書之立表志其殆侵官離局者乎考其濫觴所出起乎司馬氏按馬記以史制名班書持漢標目史記者載數千年之事無所不容漢書者紀十二帝之時有限斯極固既分

遷之記判其去取紀傳所存惟留漢日表志所錄乃盡
犧年舉一反三豈其若是膠柱調瑟不亦繆歟但固之
蹢駁既往不諫而後之作者咸習其途宋史則上括魏
朝隋書則仰包梁代求其所書之事得十一於千百一
成其例莫之敢移永言其理可為歎息當魏武乘時撥
亂電掃羣雄鋒鏑之所交網羅之所及者蓋惟二袁劉
呂而已卓進鴟行弑燃臍就戮總關王室不涉霸圖而陳
壽國志引居傳首夫漢之有董卓猶秦之有趙高昔車

令之誅既不列漢史何太師之斃遂獨刊於魏書乎兼
復臧洪陶謙劉虞孫讚生於季末自相吞噬其於曹氏
也非唯理異犬牙固亦事同風馬漢典所具而魏冊仍
編豈非流宕忘歸迷而不悟者也亦有一代之史上下
相交若已見他記則無宜重述故子嬰降沛其詳取驗
於秦紀伯符死漢其事斷入於吳書沈錄金行上羈劉主
魏刊水運下列高王惟蜀與齊各有國史越次而載孰
曰攸宜自五胡稱制四海殊宅江左既承正朔斥彼魏

胡故氏羌有錄索虜成傳魏本出於雜種竊亦自號真君其史黨附本朝思欲凌駕前作遂乃南籠典午北吞諸僞比於羣盜盡入傳中但當有晉元明之時中原秦趙之代元氏膜拜稽首自同臣妾而反列之於傳何厚顏之甚邪又張李諸姓據有涼蜀其於魏也校年則前後不接論地則參商有殊何預魏氏而橫加編載夫尚書者七經之冠冕百氏之襟袖凡學者必先精此書次覽羣籍譬夫行不由徑非所聞焉修國史者若旁採異

聞用成博物斯則可矣如班書地理志首遂全寫禹貢
一篇降為後書持續前史蓋以水濟水牀上施牀徒有
其煩竟無其用豈非惑乎昔春秋諸國賦詩見意左氏
所載惟錄其章名如地理為書論自古風俗至於夏世
宜云禹貢已詳何必重述古文益其辭費也若夷狄本
係種落所興北貊起自淳維南蠻出於槃瓠高句麗以
鱉橋獲濟吐谷渾因馬鬬徙居諸如此說者求之歷代
何書不有而作之者曾不知前撰已著而後修宜輟遂

乃百世相傳一字無改蓋駢指在手不加力於千鈞附
贅居身非廣形於七尺為史之體有若於斯苟濫引他
事豐其部帙以此稱博異乎吾黨之所聞陸士衡有云
雖有愛而必捐善哉斯言可謂達作者之致矣夫能明
彼斷限定其折中歷選自古惟蕭子顯近諸然必謂都
無其累則吾未之許也

編次第十三

昔尚書記言春秋記事以日月為遠近年世為前後用

使閱之者雁行魚貫皎然可尋至馬遷始錯綜成篇區
分類聚班固踵武仍加祖述於其間則有統體不一名
目相違朱紫以之混淆冠屨於馬顛倒蓋可得而言者
矣尋子長之列傳也其所編者惟人而已矣至於龜策
異物不類肖形而輒與黔首同科俱謂之傳不其怪乎
且龜策所記全為志體向若與八書齊列而定以書名
庶幾物得其朋同聲相應者矣孟堅每一姓有傳多附
出餘親其事跡尤異者則分入他部故博陸去病昆弟

非復一篇外戚元后婦姑分為二錄至如元王受封於楚至孫戊而亡按其行事所載甚寡而能獨載一卷者實由向歆之助耳但交封漢始地起列藩向居劉末職纔卿士昭穆既踈家國又別適使分楚王子孫於高惠之世與荆代並編析劉向父子於元成之間與王京共列方於諸傳不亦類乎又自古王室雖微天命未改故臺名逃債尚曰周王君未繫頸且云秦國況神璽在握火德猶存而居攝建年不編平紀之末孺子主祭咸書

莽傳之中遂令漢餘數歲湮沒無覩求之正朔不亦厚
誣當漢氏之中興也更始升壇改元寒暑三易世祖稱
臣北面誠節不虧既而兵敗長安祚歸高邑兄亡弟及
歷數相承作者乃抑聖公於傳內登文叔於紀首事等
躋僖位先不啻夫東觀東筆容或諂於當時後來所修
理當刊革者也蓋逐兔爭捷瞻烏靡定羣雄僭盜為我
驅除是以史傳所分真偽有別陳勝項籍見編於高祖
之後隗囂孫述不列於光武之前而陳壽蜀書首標二

牧次列先主以繼焉璋豈以蜀是僞朝遂乃不遵恒例
但鵬鸞一也何大小之異哉春秋嗣子諒闇未踰年而
廢者既不成君故不別加篇目是以魯公十二惡視不
預其流及秦之子嬰漢之昌邑咸亦因胡亥而得記附
孝昭而獲聞而吳均齊春秋乃以鬱林為紀事不師古
何滋章之甚與觀梁唐二朝撰齊隋兩史東昏猶在而
遽列和年煬帝未終而已編恭紀原其意旨豈不以和
為梁主所立恭乃唐氏所承所以黜末元而尊中興顯

義寧而隱大業苟欲取悅當代遂乃輕侮前朝行之一

時庶叶權道播之千載寧為格言

寧一作未

尋夫本紀所書

資傳乃顯表志異體必不相涉舊史以表志之帙介於紀傳之間降及蔚宗肇加釐革沈魏繼作相與因循既而子顯齊書穎達隋史不依范例重遵班法蓋擇善而行何有遠近聞義不徙是吾憂也若乃先黃老而後六經後外戚而先夷狄老子與韓非並列賈誼將荀彧同編孫弘傳讚宜居宣武紀末宗廟迭毀枉入立成傳中

如斯舛謬不可勝紀今畧其尤甚者耳故不復一二而詳之

稱謂第十四

孔子曰唯名不可以假人又曰名不正則言不順言不順云云必也正名乎是知名之折中君子所急况復列之篇籍傳之不朽者耶昔夫子修春秋吳楚稱王而仍舊曰子此則褒貶之大體為前修之楷式也馬遷撰史記項羽僭盜而紀之曰王此則真偽莫分為後來所惑

者也自茲已降訛謬相因名諱所施輕重莫等至如更
始中興漢室光武所臣雖事業不成而歷數終在班范
二史皆以劉玄為目不其慢乎古者二國爭盟晉楚並
稱侯伯七雄力戰齊秦俱曰帝王其間雖勝負有殊大
小不類未聞勢窮者即為匹庶力屈者乃成寇賊也至
於近古則不然當漢氏云亡天下鼎峙論王道則曹逆
而劉順語國祚則魏促而吳長但以地處函夏人傳正
朔度長挾大魏實居多二方之於上國亦猶秦繆楚莊

與文襄而並霸

蜀昭烈主可比秦繆公
吳大帝可比楚莊王

逮作者之書事

也乃沒吳蜀號謚呼權備姓名

謂魚豢
孫盛等

方於魏邦懸隔

頓爾懲惡勸善其義安歸續以金行版蕩戎羯稱制各

有國家實同王者晉世臣子黨附君親嫉彼亂華比諸

羣盜此皆苟徇私忿忘夫至公自非坦懷愛憎無以定

其得失至蕭方等始存諸國名謚僭帝者皆稱之以王

此則趙猶人君加以王號杞用夷禮貶同子爵變通其

理事在合宜小道可觀見於蕭氏者矣古者天子廟號

祖有功而宗有德始自三代迄於兩漢名實相允今古

共傳降及曹氏祖名多濫必無慚德其為武王故陳壽

志獨呼武曰祖至於文明但稱帝而已自晉以還竊號

者非一如康穆兩帝劉蕭二明梁簡文兄弟

兼謂孝元帝也

齊

武成昆季

兼言宣孝昭也

斯或承家之僻王或亡國之庸主不

謚靈謬為幸已多猶曰祖宗孰云其可而史臣載削曾

無辨明每有所書必存廟號何以申勸沮之義杜渝濫

之源者乎又位乃人臣跡參王者如周之宣父季歷晉

之仲達師昭追尊建名比諸天子可也必若當塗所出
宦官攜養帝號徒加人望不愜故國志所錄無異匹夫
應書其人直云皇之祖考而已至如元氏起於邊朔邊

作沙其君乃一部之酋長耳道武追崇所及凡二十八君自

開闢以來未之有也而魏書序紀襲其虛號生則謂之
帝死則謂之崩何異沐猴而冠腐鼠稱璞者矣夫歷觀
自古稱謂不同緣情而作本無定準至若諸侯無諡者
戰國已上謂之今王天子見黜者漢魏以後謂之少帝

周衰有共和之相楚殺有夾敖之主趙他而曰尉他英
布而曰黥布豪傑則平林新市寇賊則黃巾赤眉園綺
友朋共云四皓奮建父子都稱萬石凡此諸名皆出於
當代史臣編錄無復弛張蓋取叶隨時不藉稽古及後
來作者頗慕斯流亦時採新名列成篇題第音若王晉之
十士寒雋沈宋之二凶索虜即其事也唯魏叔遠不師
古近非因俗自我作故無所憲章其撰魏書也乃以平
陽王為出帝司馬氏為僭晉桓劉已下通曰島夷夫以

諂齊則輕抑關右黨魏則深誣江外愛憎出於方寸與奪由其筆端語必不經名惟駭物昔漢世原涉大修墳墓乃開道立表署曰南陽阡欲以繼跡京兆齊聲曹尹而人莫之肯從但云原氏阡而已故知事非允當難以遵行如叔之苟立詭名不依故實雖復邗諸竹帛蜀本作形

宋本作邗邗古與刊同

終靡傳於諷誦也

蜀本作罕宋本作靡

抑又聞之帝

王受命歷數相承雖舊君已沒而致敬無改豈可等之凡庶便書之以名者乎近代文章實同兒戲有天子而

稱諱者若姬滿劉莊之類是也有匹夫而不名者若步

兵彭澤之類是也史論立言理當雅正如班述之叙聖

卿也而曰董公惟亮范贊之言季孟也止曰隗王得士

習談漢主則謂昭烈為玄德

習氏漢晉春秋以蜀為正統其編目叙事皆謂蜀先

主為昭烈皇帝至於論中語則呼為玄德

裴引魏室則曰文帝為曹丕夫以

淫亂之臣忽隱其諱

淫謂董賢亂謂隗囂

正朔之后反呼其名意

好奇而輒為文逐韻而便作

班固袁紀贊曰宛孿董公惟亮天功隗囂公孫述傳

贊曰公孫習更隗王得士

用捨之道其例無恒近代為史通多此失

上才猶且若是而況中庸者乎今略舉一隅以存標格
云爾

史通卷四